

## ادخلوها آمين

وفين الحارة يا حارة

ما كنا زمان نزوقها

ونفرش أرضها نشارة

فانوسنا نعلقه بفتلة

ونشبك سلك سنارة

ماهي الحارة كات بيتنا

وفيها نلّم لمتنا

على طيارة م الفوبيا

نرصّ حجارة لعبتنا

وقطر بتصنعه ايدينا

لا كان م الصين ولا كوريا

ونعمل مركبة من طين

على بكرة نمشيها

ونحلم إننا فيها

نودّع أرضها الحارة

ومش عارفين

أتاري الحلم جوّانا

واحنا لسه صغيرين

يا حارة كنتِ سايعانا

محاوطة علينا بحيطانك

وسامعانا...

دا لما كنا نتوجع ف أحضانك

دفا الجيرة، ولمة ناس على الفطرة

يداويننا

وعيشة يادوب  
وكنت باشوف الصبر جدرانك  
وفي عمنا أيوب  
وبيوزع بلح فطرة  
ورعشة إيدہ خوف بكرة  
من الغربية.. من الفرقة  
وكان دايمًا يفكرنا  
بحلق الباب  
ودا اللي كان فقط باقي  
واحنا كنا مش فاهمين  
ولما مات...  
وماتت فينا كام ذكرى  
وقالت جدتي عنه

بإن الباب دا باب أيوب

فروحوا شوفوا اللي كان مكتوب

لقينا كلمتين اتنين:

(ادخلوها آمنين)

وفرّ الدمع في عينينا

وألف خسارة وخسارة

نحتنا الباب بكام فارة

وأصبح أصلنا نشارة

بسعفة نخلة الحارة

كنسنا الحارة من ناسها

وبعنا أرضها شقارة ونقارة

ورحنا لغربة غدارة

وقرش ماكانش له عازة

كنقطة مِيَه ف قزازة

وسبنا النيل

بيتلوى على الشطّين

وسبنا الحارة مهجورة

وبعنا الأرض بالتورة

وطيارة اللي كات فوبيا

خدتنا لآخر الدنيا

وكام دايرة ودوارة

ومركبنا اللي كات م الطين

في وسط البحر اهي باشت

ومش راجعين

وباش العمر ويّاها

لكين...

دي لسه الحارة موجودة

وبتسمي على ولادها

نوى التمر اللي كان باقي

هناك من عمنا أيوب

صبح نخلة

وصار الطرح فيها قلوب

تحنّ لحارة الجدعان

وحلق الباب بتاع أيوب

(ادخلوها آمنين)

حارتي حارة الطيبين